

ጳውሎሲ ጸምቶሳስ ጳፊዳ ናምኣንሉ ኪታ ጊዶ ቆፋ

ጳውሎሲ ጸምቶሳስ ጳፊዳ ሃ ናምኣንሉ ኪታይ ጳውሎሲ ባስ ዳር ማዶ ጊዱ ባና ማዲዛ እሶ ላጌ ጊዱዳ ናቴላ ና ጸምቶሳስ ዬዲዳ ዘሬ ቃላ ኦይኪዴስ፤ ጳውሎሲ ጸምቶሳ እዚ ዳር ዳንዳያን ሚናና ማላ ዘሪዴስ፤ ጸምቶሲ ጳውሎሳፔ ኤኪዳ ሚኖ ዘሬ ቃላይ ዬሱስ ኪርስቶሳ ጊሻስ ኣማኔቲዲ ማርካታና ማላ ሚሺራቸ ቃላ፡ ካሴ ጋልኣ ጫቆ ጋርሳን ዲዛ ቲሚርቲዛካ ሚንሉ ኦይካና ማላኔ እዛስ ኣይኮ ዋዬይ ዳሪኮካ ታማርሶኒኔ ሚሺራቸ ቃላ ሳባኮ ኣጎንታ ሚናና ማላሳ።

ጸምቶሳስ ኢሜቲዳ ሚኖ ዮኦይ ጮ ሚላ ኤያቴላን ኣሳይ ፓላሜቲዛ ዮኦፔ እዚ ሃካና ማላሳ፤ ሄሳ ማላ ዮኦይ ሲዬዛይታ ዋሬስ ኣቲን እዚ ኢሚዛ ሃራ ጎኣይ ዴና።

ሃይሳ ኡባን ጸምቶሲ ዩሺ ቆፓናስ ቤሲዛይ ጳውሎሲ ኣማኖን ዋኒ ዴኢዳኮ፡ እዚ ኣይ ማላ ጌንጪዳኮ እዛ ሲቆዛ፡ እዛ ሚኖቴላኔ እዛ ቦላ ጋኪዳ ዋዬዛ ሊሚሶ እዚ ካላና ማላሳ። ጳውሎሲ ሃይሳ ሃ ኪታ ጳፊዳይ ባ ላይላ ወርሴላን ሃይቆ ፒርዳይ ኢዛ ቦላ ፒርዴቲ ኡቲን እዚ ሃይቆ ናጊዛ ዋዴኮ። (2ጸም 4:6-8)

ሃ ማጻፋይ ኦይኪዳ ኩሜላ ቆፋ

ጌሎሶ 1:1-2

ጸምቶሳስ ኢሜቲዳ ዘሬ 1:3—2:13

ኣሳይ ካዲዛ ዋዴ ሚኒ ኤቆ 2:14—4:5

ሄ ዋዴ ዲዛ ሃኖታኔ ሄይታ ጊሻስ ኢሜቲዳ ዘሬታ 4:6-18

ኩሻ ቆፋ 4:19-22

¹ ዬሱስ ኪርስቶሳራ ኢሲፊቴላን ዲዛ ዴኦ ሂዶታ ቃላ ጊሻስ ዮታና ማላ ጸሳ ሸኔን ዬሱስ ኪርስቶሳ ሃዋሬ ጊዱዳ ጳውሎሳፔ፡

² ዶሴቲዳ ታ ና ጸምቶሳስ ኪያቴሉ፡ ማሮቴሉኔ ሳሮቴሉ ጸሳ ኣዋፔ ጎዳ ዬሱስ ኪርስቶሳፔ ኔስ ጊዶ።

ጸምቶሳስ ኢሜቲዳ ዘሬ

3 ፓጩይ ባይንዳ ጋላሲኔ ቃማ ኔ ጊሻስ ዋሳን ቆፍሳሼ ካሴ አዋቲ ኦሊዳ ማላ ጌሻ ዋዚናራ ታ ጎይኒዛ ጸሳ ታ ጋላታይስ።

4 ካሴ ኔ አፋንሳ ቆፓ ኤካዳ ታ ኔና ቤያዳ ኡፋዬታና ላሞታይስ።

5 ቆጶፔ ቆሞን ጊደንታ ኔ አማኖዛ ታ ቆፓይስ፤ ሄ አማኖይካ ኮይሮ ኔ አዬይ አዩን ሎይዲኒኔ ቃሴካ ኔ አዬዩን ኤዋንቄን ዴስ፤ ሃኢ ቃሴ ኔ ቦላ ዲዛይሳካ ታ ኤራዲስ።

6 ሄሳ ጊሻስ ታኒ ታ ኩሼ ኔ ቦላ ዋሊን ኔ ኤኪዳይሳ ኔ ቦላ ዲዛ ጸሳ አሞታ ኔ ዴንፊላና ማላ ታ ኔና ቆፍሳይስ።

7 ጸሲ ኑስ ኑኒ ኑ ሁኤ ሃራናስ ጸሳ ዋልቃ ኤራናሲኔ ሲቄታና አያና አሚዴስ አቲን ባቦ አያና አሚቤና።

8 ሄሳ ጊሻስ ጎዳ ጊሻስ ማርካታናስ ዋይኮ ጎዳ ጊሻስ ቃሼቲዳ ታናን ዬላቶፓ፤ ጊዶ አቲን ጸሳ ዋልቃራ ሚሺራች ቃላ ጊሻስ ኔ ታናራ ሜቶ ኤካ።

9 ኑ አይኮካ ኦሊዳ ጊሻስ ጊደንታ ዲሺን ባ ቆፋ ማላኔ ባ ኪያቴላ ማላ ኑና አሺዴሲኔ ኑና ባሰ ዲማሲዲ ዴይጊዴስ። ሄ ኢዛ ኪያቴላ ሜርና ዋዴፔ ካሴ ዬሱስ ኪርስቶሳ ባጋራ ኑስ አሚቲዴስ።

10 ሃኢ ቃሴ ኢዚ ሃይቆ ኡባ ዳይሲዲ ሚሺራች ቃላ ባጋራ ኑና ፖኦን ኬሲዳ ኑ ዳሌ ዬሱስ ኪርስቶሳ ዩሳን ቆንጨዴስ።

11 ታኒካ ሃይሳ ሃ ሚሺራች ቃላ ዮቲዛዴ፣ ኪቲቲዳዴኔ አስታማሬ ጊዳዳ ሹሜታዲስ።

12 ታኒ ሜቶ ቤኢዛይካ ሄሳ ጊሻሳ፤ ጊዲኮካ ታ ኦና አማኒዛኮ ታኒ ታ አማኒዛዴ ሻካ ኤሪዛ ጊሻስ ኢዛን ዬላቲኬ። ታ ኢዛስ አሚዳ ሃዳራ ሄ ጋላሲያ ጋካናስ ኢዚ ናጋናስ ዳንዳይዛይሳ ታ ሻካ ኤራዲስ።

13 ኔ ታፔ ሲዬዳ ቲሚርቲዛ ዬሱስ ኪርስቶሳራ ኢሲፌቴላን ዲዛ አማኖኒኔ ሲቆን ሌሚሶ ሂስታ ኦይካ።

14 ኔስ አሚቲዳ ሎኦ ሃዳራ ኑናን ዲዛ ጸሎ አያናን ናጋ።

15 ኢሲያ አወራጃ ጊደን ዲዛይቲ ወሪካ ታና ኣጊዳይሳ ኔ ኤራሳ፤ ፊልጎሲኔ ሄርሞጌኔሲ ታና ኣጊዳ ኣሳራ ዴቲስ።

16 ሄኔሲፎሬ ሶ ኣሳ ጎዳይ ማሮ፤ ኣይስ ጊኮ ኢዚ ታና ዳሮ ዋዴ ሚንፊሊዴሲኔ ታኒ ሳንሳላታን ቃሼታ ዲሺን ታና ቤኢዲ ዬላቲቤና።

17 ሃራፔካ ኢዚ ኦሮሜ ዩዳ ዋዴ ታና ኮዬ ኮዬዲ ዴሚዴስ።

18 ወርሴላ ፒርዳ ጋላስ ጎዳይ ኢዛ ፒርዳፌ አሾ፤ ኢዚ ታና ኤፌሶኔን ኣይ ማላ ማዲዳኮ ኔ ሎኤላ ኤራሳ።

2

1 ሄሳ ጊሻስ ታ ናዞ ኔኒ ጎዳ ዬሱስ ኪርስቶስ ኪያቴላን ሚና።

2 ዳር ማርካታ ሲንላን ኔ ታፔ ሲዩዳይሳ ሃራታ ታማርሳናስ ዳንዳይዛይታሲ ኣማኔቲዳ ኣሳታስ ሃዳራ ኢማ።

3 ዬሱስ ኪርስቶሳስ ኣማኔቲዳ ሎኦ ዋታዳራ ማላ ታናራ ሜቶ ኤካ።

4 ዋታዳራቴላን ኦሊዛይይ ባ ሃላቃ ኡፋይሳናስ ዳፌቴስ ኣቲን ሃራ ባና ቃጺሊዛ ኦሶን ጌሊ ኤሬና።

5 ሄሳሶካ ጋዴ ዋጺዛይይ ዋላ ዋጋ ናጎንታ ዋጺኮ ጾኖ ኣኪሊኤ ኤኬና።

6 ጎባ ጎሻንቻይ ባ ጎዬ ኬሲዳ ካላ ጸራ ሚዛዴ ጊዳናስ ቤሴስ።

7 ታ ኔስ ጊዛይሳ ኔ ዋዚናን ዋላ ሲዩኮ ጎዳይ ኔስ ዮኦ ኡባን ኣኬካ ኢማና።

8 ሃይቆፔ ዴንዲዳ ዳዊቴ ዜሬሐ ጊዲዳ ዬሱስ ኪርስቶስ ቆፓ፤ ታ ዮቴዛ ሚሺራቾ ቃላይካ ሄሳ።

9 ሄሳ ጋሶን ኢታ ኦሊዳ ኣሳ ማላ ቃሼታና ጋካናስ ዋዬ ቤያይሰ፤ ጊዶ ኣቲን ጸሳ ቃላይ ቃሼቴና።

10 ሄሳ ጊሻስ ኪርስቶስ ባጋራ ዲዛ ኣቶቴሊኔ ሜርና ቦንቾ ዴማና ዶሬቲዳይታ ጊሻስ ጋዳ ዉርሳካ ዳንዳያዲስ።

11 «ኦ ኢዛራ ኢሲፌ ሃይቂኮ

ኦ ኢዛራ ዴኦን ዳና።

12 ዳንዳያን ሚኒኮ

ኦ ኢዛራ ካዋታና።

ኦ ኢዛ ካዲኮ

ኢዚካ ኦና ካዳና።

13 ኦ ኢዛስ ኣማኔቶንታይታ ጊዲኮ

ኢዚ ሜርናስ

ኣማኔቲዳ ማላ ዳና።

ኢዚ ባርካ ባና

ካዳና ዳንዳዬና»

ጌቴቲዳ ቃላይ ኣማኔቲዳይሳ።

ሚኖ ኦሳንቻ

14 ሃይታ ሃ ዮኦታ ጊሻስ ኣሳ ቆፊሶ ኣጎፋ፤ ኣሳይ ባ ጊዶን ኢሶይ ኢሳራ ቃላ ጋሶን ፓላሜቶንታ ማላ ጸሳ ሱንላን ዞራ፤ ሄሳ ማላ ዮኦይ ሲዩዛይታ ሞሬስ።

15 ቱሙ ጸሳ ቃላ የቲዛዴ፥ ዩላኸንታ ኦሳንቻኔ አሲ ኔ ጊሻስ ሎኦ ማርካቲዛዴ ጊዳዳ ኔናቴላ ወርሳ ጸሳ ሲንሐ ሺሻናስ ሚና።

16 ጮ ሜላ ዶና ላላቤቴላፌ ሃካ፤ ሄሳ ማላ የኦን ዋጼቲዳ አሳቲ ጸሳፌ ሃኪ ሃኪ ቤቴስ።

17 ኢስታ ቲሚርቴይ ሳኪዲ ፓጽንታ ጌዴ ጉጂ ጉጂ ዳኬቲ ቢዛ ማዱንላ ማላ፤ ሄሚኔዎሲኔ ቃሴ ፊልጸሳ ጌቴቲዛይቲ ሄሳ ማላ ቲሚርቴ ታማርዛይታ ጊዶን ዴቴስ።

18 ሄይቲ ቱማቴላፌ ሃኪዲ ጮ ሜላ ዋዬቴስ፤ ኢስቲካ፥ «ሃይቆፔ ዴንሉ ሃይሳፌ ካሴ ሃኒ አፏዴስ» ጊዲ ኢሲ ኢሲ አሳ አማኖ ሺሪ ዩጌቴስ።

19 ጊዶ አቲን፥ «ጎዳይ ባስ ጊዲዛይታ ኤሬስ።» ቃሴካ፥ «ጎዳ ሱንሐ ጴይጊዛይ ወሪ ኢታፔ ሃኮ» ጊዛ ማታሚይ ኢዛ ቦላ ዲዛ ላሜቶንታ ጸሳ የቻይ ላሜቲቤና።

20 ኢሲ ጊታ ኬላን ዋርቃፌኔ ቢራፔ ጸላ ጊዶንታ ሚላፌኔ ኡርቃፌ ኦሴቲዳይቲ ዲዛይሳሉ ሄይታንታፌካ ባጋይቲ ቦንቾ ኦሶስ፥ ባጋይቲ ቃሴ ሂራይሶ ኦሶስ ኤኬቴቴስ።

21 ሄሳ ጊሻስ ኦኒካ ሃይታ ታ ጊዳ ኢታ የኦታፔ ባና ጌሺኮ፤ ሄሳዴይ ቦንቾ ኦሶስ ጊዲዛዴኔ አንጃቲዳዴ፤ ጎዳ ጎኢዛዴኔ ሎኦ ኦሶስ ጊጌቲዳዴ ጊዳና።

22 ፓንላቴላ ኢታ አሞቴላፌ ባቃታ፤ ጌሻ ዋዚናራ ጎዳ ጴይጊዛ አሳታራ ጲሎቴሐ፥ አማኖ፥ ሲቆኔ ሳሮቴሐ ካላ።

23 ጎኦይኔ ሂዶታይ ባይንዳ ኤያታ ፓላማፔ ሃካ፤ ጋሶይካ ሄሳንታ ማላይ ኦሽ ካሌሊዛይሳ ኔ ኤራሳ።

24 ጎዳ ኦሳንቻይ አሳራ ኦዬታናስ ቤሴና፤ ሄሳፌ ቦላራ አሳ ኡባ አቻን ኪያ፥ አስ ታማርሳናስ ዳንዳይዛዴኔ ሚኖ አስ ጊዳናስ ቤሴስ።

25 ኢዚ ባናራ ኤቄቲዛ አሳታ አሽኬቴላራ ኦይኪዛዴ ጊዳናስ ቤሴስ፤ ኦኔ ኤሪዛይ ኢስቲ ቱማ ኤራና ማላ ጸሲ ኢስታስ ማሬታናስ ዋዴ አማና ዳንዳዬስ።

26 ሄሲካ ኢስቲ ዩሺ ቆፒ ሲሚዲ ኢዛ ሼኔ ኩንላና ማላ ኢስታ ዲኢ ኤፊዳ ጸላኤ ናርጸፌ ኢስቲ ኬሲ ኤካና።

3

ወርሴላ ዋዴን ያና ሜቶታ

1 ጊዶ አቲን ዋዴ ወርሴላን አስ ሜቲዛ ዋዴይ ያናይሳ ኔ ኤራ።

2 አሳይ ባና ደሲዛዴ ጊዳና፤ ሚሽ ሲቁዛይታ፥ ባናን ጨቁቲዛይታ፥ ኦቶራንቻታ፥ ጫሻንቻታ፥ ባና ዩሊዳይታስ ኣዛዜቶንታይታ፥ ጋላቶንታይታኔ ጌሻቴሊ ባይንዳይታ፥

3 ሲቆይ ባይንዳይታ፥ ኣቶ ጊ ማርንታይታ፥ ኣሳ ሱንል ሞሪዛይታ፥ ባርካ ባና ሃርንታይታ፥ ሜንጼ ኢታታ፥ ሎኦ ሚሽ ደሶንታይታ፥

4 ካዲዛይታ፥ ናጌቶንታይታ፥ ጮ ሜላ ኦቶሬቴላን ኩሚዳይታ፥ ጸሳፌ ኣሊዲ ሎኦ ዴል ደሲዛይታ ጊዳና።

5 ኣማኒዛ ኣሰ ሚሳታና ሺን ኣማኖስ ዲዛ ዎልቃ ካዳና፤ ሄይታ ማላታፔ ኔ ሃካ።

6 ሄይታንቲ ኢሲ ኢሲ ኬሌ ካልጺ ጌሊዲ ዳሮ ዴጾ ናጋራኒኔ ዲማ ዲማ ኢታ ኣሞቴላ ጋርስ ጌሊዲ ያኔ ሃ ቃጺዛ ኣማኖን ላፋ ማጫሳታ ቃጺ ኦይኬቴስ።

7 ሄይታ ማላ ማጫሳቲ ኡባ ዎዴ ታማሬቴስ ሺን ቱማ ኤሬቴና።

8 ኢያኔሲኔ ኢያንባራሲ ሙሴ ቦላ ዴንዲዳ ማላ ሃይቲካ ኢስታ ቆፋይ ሞሬቲን ባስ ኣማኖፔ ኩንዲዳ ጊሻስ ቱማቴላ ኢጼቴስ።

9 ጊዶ ኣቲን ኢስታ ቆፋይ ኩሜና፤ ጋሶይካ ኢያኔሳኔ ኢያንባራሳ ኤያቴሊ ኣሳስ ቆንጨዳ ማላካ ሃይታ ሃኖይካ ኡባስ ቆንጫና።

ጳውሎሲ ጸምቶሳስ ኢሚዳ ሃዳራ

10 ኔ ጊዲኮ ታ ቲሚርቴዛ፥ ታ ዱሳ፥ ታ ዋና ቆፋ፥ ታ ኣማኖዛ፥ ታ ዳንዳያ፥ ታ ሲቆዛኔ ታ ሚኖቴላ ኡባ ኤራሳ።

11 ታ ጎዴቴላኔ ታ ዋዬዛ ኣንጾኪያን፥ ኢቆኒዮኒኔ ሊስቲራንካ ታ ቦላ ጋኪዳይሳ ኡባ ታኒ ዳንዳያን ኤኪዳይሳ ኔ ኤራሳ፤ ጊዲኮካ ጎዳይ ሄሳ ኡባፌ ታና ኣሺዴስ።

12 ቱማፔ ዩሱስ ኪርስቶሳ ጌሻ ዎዚናፔ ኣማኒ ዳና ጊዛይቲ ወሪካ ጎዴቲዛይታ ጊዳና።

13 ኢታ ጊዲዳ ባሌሊዛ ኣሳቲ ባስ ባሌቲዲ ኣሳ ባሌሊሽ ኢታቴላ ቦላ ኢታቴላ ጉጂ ጉጂ ባና።

14 ኔ ጊዲኮ ካሴ ኔ ታማራዳ ኤሪዳ ኦጌን ሚና፤ ሄሳ ኦናፔ ታማርዳኮ ኔ ኤራሳ።

15 ኔ ጉላ ናቴላፌ ሃኢ ጋካናስ ዩሱስ ኪርስቶሳ ኣማኖን ኣቶቴሊ ቤቲዛ ቲሚርቴ ኢሚዛ ጌሻ ማጻፋታ ሎኤላ ኤራዳሳ።

16 ጌሻ ማጻፋቲ ወሪካ ጸሳ አያናይ ካሌሊን ጸፊቲዳይታ፤ ኢስቲካ አስ ታማርሳናስ፤ ሃንቃናስ፤ ሱሪሳናስ ቃሴካ ጸሎቱላ ኦጌን ካሌላናስ ጎኤቲስ።

17 ሄሲካ ጸሳ አሲ ሎኦ ኦሶ ኡባስ ቤሲዛዴ ጊዳና ማላሳ።

4

1 ጸሳ ሲንላኒኔ ሄሳሶካ ፓጻ ዲዛይታ ቦላኔ ሃይቂዳይታ ቦላ ፒርዳናስ ዲዛ ዬሱስ ኪርስቶሳ ሲንላን ኢዛ ቆንጨኞላኔ ኢዛ ካዋቱላ ቆፋራ ሃይሳ ኔስ ሃዳራ ጋይስ።

2 ቃላ ሳባካ፤ ኔስ ገረን ዋይኮ ገረንታ አገን ኔኒ ኔ ባጋራ ገጌታ ኡታ፤ ዳሮ ዳንዳያራ ታማርሶን አሳ ሱሪሳ፤ ሃንቃኔ ዘራ።

3 ጋሶይካ አሳይ ወሪ ሱሪ ገዲዳ ቲሚርቲ ኤኮንታ ኢጻና ዋዴይ ያና፤ ሄሳፌ ቦላራ አሳይ ባ አሞራ ጋገዛይሳ ኢስታ ሃይሊ ሲያና ኮይዛይሳ ጸላ ኢስታስ ዮታና ማላ ባና ታማርሳና ዳሮ አስታማሬታ ባ አቶ ሺሻና።

4 ቱማ ሲያናፔ ባ ሃይላ ሃራሶ ዛሪዲ ሃይሲኤ ባጋ ሲማና።

5 ኔኒ ገዲኮ ሃኒዛ ዮኦ ኡባን ሎዱ ጋ፤ ሜቶ ዳንዳያ፤ ሚሺራቾ ቃላ ዮቶ ኔስ ኦሶ ሂስታ፤ ኔ ኦሶዛካ ፖላ።

6 ታ ቃሴ ያርሼታናስ ማታ ኡታዲስ፤ ሃይሳ ሃ አላሜዛፔ ሻኬታ ቡሳ ዋዴይ ታስ ጋኪዴስ።

7 ሎኦ ባጼ ታ ባጼታዲስ፤ ታ ዋጻና ዋሐ ወርሳዲስ፤ አማኖካ ናጋዲስ።

8 ሲንላፌ ታስ አኪሊሌይ ገጊ ኡቲዴስ፤ ሄሲካ ጸሎቱላ፤ ሄሳካ ቱሙ ፒርዲዛ ጎዳይ ሄ ጋላስ ታስ አማና፤ ሄሲካ ታስ ጸላ ገደንታ ኢዛ ዩሳ ላሞቲዛይታስ ኡባሲካ አማና።

ጸዉሎሲ አዛዚዳ ወርሴላ አዛዘ

9 ታኮ ኤሌላ ያናስ ኔስ ዳንዳዬቲዳ ማላ ኦላ።

10 ዴማሲ ሃይሳ አላሜዛ ሲቂዲ ታና ዩጊ አጊዲ ታሶሎንቄ ቢዴስ። ቃርቂሲ ጋላቲያ ቢዴስ፤ ቲቶሲ ጌዴ ዳልማጺያ ቢዴስ።

11 ሉቃሲ ጸላ ታናራ ዴስ፤ ማርቆሲ ታና ኦሶን ማዲዛ ገሻስ ኢዛ ኔናራ ኤካ ያ።

12 ቲቂቆሳ ኤፌሶኔ ዩዳዲስ።

13 ኔ ሃ ያሼ ታ ጸርኡዳን ካርፑሴ አቻን ዋሊዳ ታ ማቃኔ ማጻፋታ ሃራፔካ ጋልባን ጸፊቲዳ ማጻፋታ ታስ ኤካ ያ።

14 ጸርቂማላ ቆጶዛ ኢስኪንዲርሲ ታ ቦላ ዳሮ ቆሆ ጋሊዳስ ሺን ጎዳይ ኢዛስ ኢዛ ኦሶ ማላ ኢማና።

15 ኢዚ ኑ ዮቲዛ ቃላ ከሂ ኢጲዴስ፤ ኔካ ኢዛፔ ናጌታ።

16 ታና ሞቲዛ ዮኦዛስ ኮይሮ ታና አሻና ማርካ ታ ሺሺን ኦኒካ ታና ማዳና ዪቤና፤ ጊዶ አቲን ወሪካ ታና ዬጊዲ ቢዳ። ሄሳካ ኢስታ ቦላ ጸሲ ቆሆ ሂስቲ ቆዶፖ።

17 ጊዶ አቲን ቃላ ኪታይ ታ ባጋራ ኩሜል ዮቴታና ማላኔ ዳሬ አሳይ ወሪ ሲያና ማላ ጎዳይ ታ አቻን ኤቂዲ ታና ሚንሊዴስ፤ ጋሞ ዶናፔካ ታና አሺዴስ።

18 ጎዳይ ኢታ ዮኦ ኡባፌ ታና አሻና፤ ጌዴ ባ ሳሎ ካዎቴላስ ታና ሳሮራ ጋላና፤ ኢዛስ ሜርናፔ ሜርና ጋካናስ ቦንቾይ ጊዶ። አሚን።

ወርሴላ ሳሮካ

19 ጸርሲቂላስ፥ አቂላስ፥ ሄኔሲፎሬ ሶ አሳሲካ ታ ሳሮካ ጋላ።

20 ኤሪስጸሲ ቆርንቶሴን አቲዴስ፤ ጸርፎሞሲ ሳኬቲዳ ጊሻስ ኢዛ ታ ሚሊጼን አጋዲስ።

21 ባልጎይ ጋካናፔ ሲንፊታዳ ታኮ ሃ ጋካናስ ኔስ ዳንዳዬቲዳ ማላ አላ። ኤወጉሎሲ፥ ጵዴሲ፥ ቃሴካ ሊናሲ፥ ቂላወዲያይኔ አማኒዛይቲ ወሪካ ኔና ሳሮ ሳሮ ጊዳ።

22 ጎዳይ ኔናራ ጊዶ፤ ጎዳ ኪያቴሊ ኢንቴናራ ጊዶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b